

雲笈七籤卷之一百三

廿三

雲笈七籤卷之一百三

宋朝奉郎尚書左丞直學士充集賢校理賜緋魚袋借紫直學士張君房集進

傳

宋真宗御製翊聖保德真君傳序

蓋聞天心降顧邦家所以會昌靈命丕昭神

廿三

道所以協贊考載籍之攸記固今古而同符
矧復吾宗在于戰國基緒方始精感寔繁或
山祇而見形或帝所而協夢其來已久斯謂
不誣乃有接三統而開基將隆景業冠百神
而儲佑茂顯明徵奠條梅之名區號龜玉之

奧主見之於

翊聖保德真君矣太祖肇膺元曆觀德而無
言太宗祗紹睿圖順期而前告若夫述玉晨
之寶暎序斗極之仙階告國命之延洪示真
科之祕蹟洪威顯洽屏乎物魅神姦諄誨博
臨揚乎天祺民祉由是靈壇爰峙徽稱斯崇
欽奉於芬馨仰祈於先覺固惟九域咸被底
綏豈止三秦獨增忻戴暨茲沖眇續乃基扃
仰嘉話之在人瞻至神之佑世由是載稽茂
典恭益尊名以爲上帝之恒符文考之真應

安可默而無述故當垂之不刊爰詔輔臣俾
詮靈訓詢求斯至編帙旋成想風烈而昭然
思音微而可覲誠足鏤之金板祕于蘭臺披
封奏歸美之心願裁於序引屬乙夜觀文之
暇聊志於歲時題曰翊聖保德真君傳云爾

翊聖保德真君傳

推忠協謀同德守正佐理功臣樞
密使開府儀同三司行吏部尚書
同中書門下平章事上柱國太原

郡公臣王欽若編集

建隆之初鳳翔府盩厔縣民張守真因遊終
南山忽聞空中有召之者聲甚清徹守真驚
懼四顧無所見默行悚聽約數里又聞語云
汝若先行吾即在後如是者數日守真莫能
測既還其家又聞於室中曰吾受命降靈汝
廿三何爲頑梗如此不聽吾言吾若不爲宋朝大
事當已粉碎汝矣守真方異之而且懼因曰
未審是何星辰如此臨降守真性本愚戇且
昧神祇願勿憑陵必無事奉乃曰吾是高天
大聖玉帝輔臣授命衛時乘龍降世但以非

正真之士無以奉吾教汝有異骨不類常流
汝可虔心奉吾道訓也守真曰竊聞在男曰
巫在女曰覲守真雖處凡庸恥爲慈類又曰
吾上天之神非鬼魅也五嶽四瀆吾能役使
汝若迴心入道勤奉香火當令汝應大國之
徵命受真主之恩遇豈同巫覲之輩耶守真
曰神人旣若此教導敢不虔事乃設酒肉之
饌以祀焉又聞言曰吾神人也汝何爲以腥
穢瀆我以汝未曉不欲罪汝此去但以香茶
及素食鮮果爲供吾雖不食歆汝之意也守

真稽首而謝又曰吾爲汝天上之師汝別有
人間之師但訪高士以求度焉守真乃禮古
樓觀先生梁荃爲師度爲道士遂於所居之
側擇隙地出家則於北帝宮內立殿以事神
旦暮崇奉頗極精至神謂之曰觀汝虔心稱
廿三吾教導貞潔之士可以驅邪吾先將誨汝三
法俾汝爲民除妖後當令汝結壇俾汝爲國
祈福守真再拜曰守真本實凡庸粗懷愚直
當緣夙生奉事乃致今獲歸依願以至心永
奉靈德壇儀劔法恭俟靈訓

真君曰劔法有三但以剛鐵鍛爲利刃吾目
一視便可用也有疾之人俾汝揮擊邪氣銷
鑠其人無損或地祇作孽水族生妖分野爲
災國家軫慮當以上劔治之或山澤之怪飛
走之雄震駭閭閻侵毒黎庶當以中劔治之
或魑魅之徒夔魍之輩挾邪暴物作祟害人
當以下劔治之守真曰三劔之法已聞命矣
結壇之儀伏俟指教

真君曰結壇之法有九上三壇則爲國家設
之其上曰順天興國壇凡星位三千六百爲

普天大醮旌旗鑑劔弓矢法物羅列次序開
建門戶具有儀範其中曰延祚保生壇凡星
位二千四百為周天大醮法物儀範降上壇
一等其下曰祈穀福時壇凡星位一千二百
為羅天大醮法物儀範降中壇一等儻非時
禱祀不及備此三壇亦當精潔詞章鮮異花
果扣鼓集神懇禱而告去地九尺焚香以奏
亦可感應也中三壇則為臣寮設之其上曰
黃籙延壽壇凡星位六百四十其中曰黃籙
臻慶壇凡星位四百九十其下曰黃籙去邪

壇凡星位三百六十此三壇所用法物儀範
各有差降下三壇則為士庶設之其上曰續
命壇凡星位二百四十其中曰集福壇凡星
位一百二十其下曰却災壇凡星位八十一
所用儀範量有等差此九壇之外別有應物
壇或六十四位或四十九位或二十四位法
物所須各以差降士民之類可量力而為之
如臣庶上為帝王祈祐當作祈穀福時壇凡
一千二百位或為父母師尊禳災祈福當為
醮設壇隨儀增益也守真拜而受之自爾多

有徵驗不能備紀乾德中太宗皇帝方在晉
邸頗聞靈應乃遣近侍齋信幣香燭就宮致
醮使者齋戒焚香告曰晉王久欽靈異欲備
俸緡增修殿宇仍表乞勅賜宮名

真君曰吾將來運值太平君宋朝第二主修
上清太平宮建十二座堂殿儼三界中星辰
自有時日不可容易而言但為吾啓大王言
此宮觀上天已定增建年月也今猶未可使
者歸以聞太宗驚異而止太祖皇帝素聞之
未甚信異遣使齋香燭青詞就宮致禱召守

真詣闕備詢其事守真具言之且曰非精誠
懇至不能降其神仍以上聖降靈事迹聞奏
太祖召小黃門長嘯於側謂守真曰神人之
言若此乎守真曰陛下儻謂臣妖妄乞賜按
驗戮臣於市勿以斯言褻黷上聖詔守真止

廿三

五

於建隆觀翌日遣內臣王繼恩就觀設醮移
時未有所聞繼恩再拜虔告須臾真君降言
曰吾乃高天大聖玉帝輔臣蓋遵符命降衛
宋朝社稷來定遐長基業固非山林魑魅之
類也今乃使小兒呼嘯以比吾言斯爲不可

汝但說與官家言上天宮闕已成玉鐶開晉
王有仁心晉王有仁心凡百餘言繼恩惶懼
不敢隱具錄以奏因復面言神音歷歷聞者
兢悚太祖默然異之時開寶九年十月十九
日之夕也翌日太祖升遐太宗嗣位尋召守
真於瓊林苑爲周天大醮作延祚保生壇醮
罷真君降言於內臣王繼恩曰吾有言汝當
爲吾奏之曰

建隆元年奉帝言乘龍下降衛人君掃除妖
孽猶閑事縱橫整頓立乾坤國祚已興長安

泰兆民樂業保天真八方效貢來稽首萬靈
振伏自稱臣親王祝壽須臾禱遍相虔潔向
君親吾有捷疾一百萬諸位靈官萬垓人若
行忠孝吾加福若行悖逆必誅身賞罰行之
既平等天無氛穢地無塵愛民治國勝前代
萬年基業永長新

繼恩錄之於簡翌日以聞太宗覽之驚異稽
首謝曰國家之幸宗廟之慶虔荷上聖賜此
格言命緘藏於內殿尋遣內供奉官王守節
起居舍人王龜從就終南山下築宮方卜地

於終南鎮

真君忽降言於龜從等曰此地乃修建上帝
宮闕之地不可易也於是乃定凡三年宮成
中正之位列四大殿前則玉皇通明殿次紫
微殿次七元殿次真君所御殿東廡之外有

廿三

六

天蓬九曜東斗天地水三官四殿西廡之外
有真武十二元神西斗天曹四殿又有靈官
堂南斗閣並列星宿諸神之像豎鐘經二樓
齋道堂室靡不完備建碑以紀其事題曰上
清太平宮一如真君預言之制命常參官一

人監宮擇道士焚修每歲三元及誕節上本命日並遣中使致醮祀神之夕上望拜焉歲或水旱或國家將舉事率致禱焉初宮成真君忽降言謂王龜從等曰汝奉詔修宮勤則至矣然何爲不開日月華門不畫八小殿壁堦墀甃甃亦未嚴備惟求速成以冀恩寵然上天亦不掩爾功亦不赦爾罪守節龜從頗切驚懼然已奏訖役不及增備惟稽首祈謝及至闕皆獲增秩賜白金千兩既而守節染疾而亡龜從歿於兵刃此乃不掩功不赦罪

之戒明矣太平興國初太宗皇帝親征太原
真君忽降言於守真曰官家已臨汾晉非久
尅復城池汝當令監官內臣等設醮以謝勝
捷於上帝守真等曰國家大事乞俟捷音真
君曰上天已定勝負也踰旬而王師告捷監

廿三

七

宮等以聞帝遣內臣盧文壽齎內庫香藥御
署詞章詣宮陳醮以謝上帝是夕真君降言
曰官家設此大醮上帝與諸天皆喜國祚延
遠過於有唐矣至六年守真以乾明節詣闕
朝賀召見因面奏曰聖真下降俯為昌朝乞

降詔加號以答靈貺上允其奏尋下詔曰太
平宮神受命上穹降靈下土苾芬致薦肸鬻
有徵大庇斯民屢垂丕貺宜加美號以答神
休其封神為翊聖將軍詔命至宮守真焚香
以告真君忽降言曰汝當上問官家所言翊
聖者翊於何聖守真數日疑懼不敢答復言
曰汝但馳奏官家不罪汝守真遂具章以聞
太宗覽之召近臣謂之曰

玉帝輔臣所輔翊者上帝也當以此意報守
真令啓白也既而內臣傳命到宮守真詣殿

焚香以告真君曰此意是也七年守真復詣
闕朝賀真君忽降言曰吾有言汝當聞於官
家曰

大道興隆陰謀滅諸天衆聖皆欣悅宋朝社
稷甚延年太平景運初興發君上端心顯明
哲愛民治國常須切萬年基業永長新金枝
玉葉無休歇

守真得之到闕以聞詔賜守真紫衣號崇元
大師自後每遣使醮告

真君或有言守真皆密以聞至道初忽降言

謂守真曰吾建隆之初奉上帝命下降衛時
今基業已成社稷方永承平之世將繼有明
君吾已有期却歸天上汝等不復聞吾言矣
儻國家祈禱但嚴潔焚香北面告吾雖不降
言當授福衛護宗社又曰汝遇吾下降至今
三十五年勤亦多矣

廿三

八

上帝已有符命授汝為五土之主此限滿日
升汝仙官汝亦不久住也自是不復降言明
年閏七月十六日守真謂門人等曰吾已領
符命今將去矣言訖而化既而聖上嗣位崇

奉之典率遵舊式洎受元符封泰山建玉清
昭應宮於宮中寶符閣之西北隅作凝命殿
殿後爲凝命閣以奉真君大中祥符七年詔
曰誕敷寶命仰荷於至神昭報殊徵虔增於
懿號蓋爲邦之大典庇民之深旨也而況翊
宣元化式表衆靈司陰隲於含生播明威於
福地當王基肇啓固降治而已彰洎文考績
承復先期而斯應由是亟營珍館備薦徽章
蒙介福於無垠佐鴻圖於累盛顧惟眇質紹
撫綿區屬典禮之交修實祺祥之杳委緬懷

幽贊罔怠欽崇是用益以丕稱奉之茂則式
達至精之懇庶伸祗答之文期克享於寅恭
永保寧於品彙爰頒成命俯告宰司深體予
懷共宣其事翊聖將軍宜加號曰

翊聖保德真君自真君之降世也或時有所

廿三

九

受人即傳錄而岐雍之間有物魅妖怪爲害
之極者皆投誠致告則守真祈禱奉教而往
靡不祛殄凡所靈驗不可勝紀今錄其傳聞
者云守真常朝禮至

玉皇大殿觀其題曰通明殿不曉其旨因焚

香告白通明之理竊所未諭敢祈真教

真君曰

上帝在無上三天為諸天之尊萬象群仙無
不臣者常陞金殿殿之光明照於帝身身之
光明照於金殿光明通徹無所不照故為通
明殿諸天帝君萬靈侍衛仙衆梵佛悉來朝
謁仰視其殿惟見大光明中

上帝儼然仙班既退光明徧徹諸天焉有王
叟者年七十餘少事戎帥老而退居終南鎮
膽氣雄傑談五代時事歷歷可聽每聞妖怪

誕妄之事則扼腕切齒自真君之始降未甚
信嚮洎目覩靈異欣然歸仰自後常日二時
赴宮焚香伏拜雖風雨霜雪未嘗暫曠一日
忽告守真啓殿門瞻禮焚香且泣曰老夫本
懷剛氣幼事軍門不信邪魔常守正直百生

有幸得遇

上真今已衰耗大期將至所願歸全之後得
在左右以備驅使爲萬足矣真君降言而許
之未幾叟無疾而終踰旬守真忽於真君殿
前聞空中有呼其名者曰我鐵輪將軍也汝

何以略不見錄守真仰而問曰真君左右有
四將軍常侍殿中守真常所處事未知鐵輪
將軍是何星辰名位空中又曰我即王叟也
曾有至願乞侍左右今蒙收錄使掌鐵輪位
在四將軍之下汝今後或有醮祭勿忘吾名

廿三

十

也真君嘗謂守真曰吾每巡遊周天有諸位
靈官捷疾吏兵數逾百萬慧孛妖沴知吾騎
從所至皆屏跡遠避嶽鎮海瀆可以麾召而
世之物魅邪怪豈足數耶吾念汝正直付汝
劍法俾汝爲民救患禳災汝宜精勤無或懈

怠積功立名加惠及物上天所鑒當錄汝名
若慢道輕教不守虛寂自有陰責矣吾若一
怒萬物立爲埃塵汝其可當乎然汝每有責
罰乃吾小將軍怒汝不專謹爾汝自宜致恭
於彼汝所興念彼各預知不可欺心貽汝禍
患守真嘗一日從容焚香虔誠問曰守真觀
釋氏之教言天上天下無如佛者未知
三清之上品位何若願賜真語以蠲蒙滯真
君降言曰佛即西方得道之聖人也在
三清之中別有梵天居之於上帝則如世之

九卿奉天子也守真曰其教流演頗盛於世
又何理也真君曰教流中夏

帝之念也隨世盛衰亦帝之念也守真曰道
釋經典並垂於世未審崇奉何者即獲其福
真君曰太上道德經大無不包細無不納修

廿三

十一

身鍊行治家治國世人若悟其指歸達其妙
用造次於是信奉而行豈惟增福諒無所不
至矣釋氏之四十二章經制心治性去貪遠
禍垂慈訓誡證以于惡亦一貫於道矣奉之
求福固亦無涯至于周公孔子皆列僊品而

五經六籍治世之法治民之術盡在此矣世
雖諷誦多不依從若口誦而心隨心隨而事
應仁義信行禮智之道常存于懷豈惟正其
人事長生久視之理亦何遠矣守真又嘗啓
請云終南山中赤谷神祠者近鄉之人多所
祈祀屠牛擊豕以為饗饌酒樂喧沸民氓鼓
舞若斯之事其獲佑乎

真君曰終南山寔名山福地人凡境聖今古
皆然興妖致邪殺命祈福以茲俟福斯亦遠
矣既而草竊潛匿其下捕賊者積薪焚之祠

宇煨燼寂無靈異建隆末長安進士劉頴頗
有文學出於流輩嘗詣宮再拜禱曰頴欲知
將來位秩高卑願賜靈訃

真君降言曰天賦汝文性不賦汝祿位汝若
學道退閑當猶延永若妄求進身慮促汝壽

筭也頴聞之不悅而退後三歲果無成而卒
雍熙中華山希夷先生陳搏卒於張超谷石
室中世多傳其羽化守真朝禮之次因焚香
啓告曰華山陳搏近卒時人謂之尸解未審
其人功行證仙階乎敢希上真略賜指諭

真君降言曰搏之鍊氣養神頗得其要然及物之功未至但有所主掌爾端拱中知鳳翔府比部郎中高凝祐嘗就官致禮既去

真君忽降言於監官李鑄曰高凝祐行虧忠信死非久矣鑄竊志之俄而凝祐秩滿還京

廿三

十二

為三司判官鑄聞之乃復焚香啓告曰高凝祐今為此職又何福耶

真君降言曰死將至矣數月而凝祐卒吏部尚書宋白乾德中家于塾屋有弟顯小字曰岐哥年十餘歲為狐魅所惑號呼無度舉動

失常忽力敵數夫家人莫能制醫砭之董至
者必遭凌撲白因齋心遣所親詣宮致禱懇
求衛護

真君降言曰汝去吾當令守真往彼守真受
教而往方至其家坐於客館而岐哥已覺悵
惶失次家人遽出迎拜守真具問之因厲聲
呼其名須臾岐哥捽其首從中唯唯而出至
守真前戰汗悚息守真呵責移時鬼乃露形
叩頭伏罪守真以術戮之應手而斃岐哥仆
地良久而蘇即獲平愈

真君嘗忽謂守真曰山下李靖廟中有狐鬼數十盤泊於彼本方地神適有馳報慮其爲妖害民汝可速往逐之守真稟命仗劍而去須臾坐於廟前震呼數四俄而狐鬼數十悉出徧列於前惶惑驚悸守真乃責之曰此上

真下降之地汝輩豈宜雜處今未欲戮汝可速返林莽無以血汙我靈劍鬼等相顧狼狽匍匐而散守真自往至還曾不移時寓宮道士王德淵問其所適守真具道之德淵曰自此至彼往復二十里何其速耶守真曰我離

廟時以劍揮下庭樹低枝在地可驗也德淵
俟曉躍馬而觀焉果於廟前聞腥穢之氣不
可近得斷枝而還始再拜稱異時又有妖狐
數百在邠州城中頗爲怪異守真聞之因焚
香致告具道其事願奉教往彼除之

真君降言曰此狐妖輩嘗於長安南山中化
形爲菩薩之狀誘彼居民捨財爲俟其間迴
心歸善亦十有八九

上帝以此故授其符命俾爲邠州土地亦有
限數俟其歲滿當自遠去無能爲害汝不必

往也開寶中鳳翔府民陳英美家有山魃爲怪投擲瓦礫日盈其庭時放煙焰欲焚其舍財物耗散親族愁苦召術士禳禁命僧徒課誦皆不能止乃移居遠遁亦躡蹤而至英美計無所出因齋戒持香躬詣宮庭精虔以告

真君降言謂守真曰汝今速受吾命令往爲除守真再拜負劍躍馬再宿而至其家而擲瓦之聲喧囂如故觀者填隘皆曰此道士必不能去此怪守真乃盥滌嚴潔整衣引劍而入其怪忽然而止是夕爲壇於庭中守真喫

劍立其上厲聲徐呼曰山魃鬼何在乎黨爲
妖未已當出與吾較勝不然則當去萬里之
外釋汝之罪如是移時消無影響自是其家
安肅乃隨守真詣宮陳醮以謝焉又長安富
民楊氏家有鬼物爲怪擲瓦縱火一日萬變

廿三

十四

聚族憂惶莫可寧處時有術士李捉鬼者尤
善符禁楊氏召之方及其門若爲物所繫匍
匐而起俄復顛隕如是者三遂狼狽而走楊
氏復召僧衆爲道場誦經作梵唄以祛之俄
又若有物攫其道具或投於屋或棄於井群

僧惶懼而去乃至擣衣砧石亦自空中騰起
三三兩兩相逐而落中庭遇物凌觸而物無
所損如是之怪尤衆不可具紀楊氏素聞
真君之靈乃躬持香燭等馳赴焚禱具言其
怪且求驅殄

真君降言曰汝當速歸吾令守真繼往也守
真尋再拜而往其家士民觀者填隘其戶守
真易衣整冠呪水揮劔行於四隅其怪即寂
然無聲守真謂楊氏曰此妖伏矣請爲醮以
祛之向夕結壇焚章禮畢而去一城之衆稽

首稱歎守真既歸楊氏隨詣宮中陳黥以謝
又富民劉文璨者忽爲狐鬼所惑心神恍惚
動止不寧市中逢道流語之曰子面有妖氣
必爲邪物所著

真君下降可虔心禱之必愈斯疾文璨乃自

廿三

十五

齋香燭晨夕馳赴中路爲鬼物所追或爲僧
尼婦女或爲商賈萬端誘惑不進文璨既迷
且惑復遇道流於路具告其故道流曰是皆
鬼物也汝宜逕往無或退志爲羣妖所害文
璨心悟不數日奔迫至宮潔齋懇至百拜殿

下

真君降言曰知汝遠來吾今令守真爲汝除
邪是夕守真立文璨於庭中守真仗劍嚙水
呵叱數四文璨懵然踣於地移時而起曰適
先生呵叱之際見數人若神將者各擒二鬼
而去文璨惶駭不覺顛仆今神思清爽如酣
醉之始醒也百拜而去自

真君之臨降官吏民庶不遠千里或馳誠遙
禱或齋戒朝拜以祈真受時有所聞大抵多
隨其性習加以訓勗人臣依於忠人子依於

孝清淳者示之格言貪酷者警以要道詞甚
平易頗叶音韻然獲聞之者至寡今據其所
傳錄之如左乾德中驪山白鹿觀道士馮洞
元朝禮之次焚香虔告曰洞元講孔子之書
依老氏之教積有年矣而修身鍊行未得真

旨幸逢

上真敢求一言

真君降言曰

到境始知安形忘靈物閑真空須照達幽微
即大還動觀無障礙希夷合自然功成神莫

測變化可冲天去住由自己三官赦舊愆命
曹除罪簿六丁奏上天衆生要修道須知無

上源

洞元百拜虔謝而去開寶中侍御史路冲奉
詔知鳳翔府就宮禮請守真就府署中陳醮

廿三

十六

祈降是夕潔齋致禱曰冲身居職守阻拜真
儀輒以蘋藻虔祈降鑒乞賜真語以導蒙昧
真君降言曰盡力事君以爲忠臣濁財勿顧
邪事莫聞整雪刑獄救療人民動合王道終
爲吉人積愆累咎必有沈淪衆生本無形之

性配有形之軀曠劫以來不能自悟自有無極世界不夜之鄉混合太虛杳冥同理

又曰

六合乾坤內衆生多不會造業向前行如盲驀江海如將智慧觀自越千重海

冲再拜錄而奉之左補闕王龜從一日齋心詣宮焚香懇禱曰凡庸賤類累咎無涯幸逢上真願賜靈誨如何修身以獲遐壽

上真君降言曰勸汝修鍊莫如精勤精勤不怠上聖皆聞太平降世用武興文無文則不正

用武則益君食祿利勿違王命行吉善但守
清貧清貧者響合天地濁富者像火投冰投
冰者火緣漸滅積惡者自貫其身自貫者殃
及七祖地府下痛害及親吾懸千尺之索提
鈞有緣之人道之尊德之貴大道能生一切

廿三

十七

物衆生頭象天足象地中心空然合真理鑿
戶牖以爲室房室之中有一物亦無形亦無
影杳杳冥冥人不識若能識者得長生陽在
天陰在地二氣同和誠有謂空中造化乃自
然自然之中生萬類天不高地不卑大道混

合虛無理學道衆生審欲聞此是修行崇妙
門開寶中丞相沈倫嘗連綿卧疾虔心遣使
詣宮陳醮致告曰倫濁穢之質病惱所侵如
何修行得免茲患敢期聖語以導愚蒙

真君降言曰靈物不病形軀自安形軀有病
返照而看來人錄之歸致於倫倫捧覽之驚
喜曰吾得之矣尋而疾愈復遣人詣宮醮謝
道士王德淵因遊終南山寓止宮中勤奉香
火好養生而性褊多所恚怒忽一日

真君降言謂之曰汝學道修真先當調習其

性以順天和忘諸有爲勿耗心識融怡凝湛
道乃可見復戒之曰莫管內莫管外來往真
靈無罣礙所居安樂是汝家各自勤行莫相
待莫相待先達之人無滯礙真空妙樂有天
堂與聖相同滅諸罪

又曰

妙理須行到周旋皆合道舉措見真空真空
無煩惱混合太虛中自有無聲樂地鑪天竈
間皆同凡聖道常將智慧觀可向今生了
德淵曰上感

真君降言教示不曉前篇內與聖相同滅諸
罪願垂誨諭

真君曰汝若除煩入靜鍊心修真積累其功
數盈之後泥丸百節元神靈通而自同於聖
天堂妙樂無所不至豈更有諸罪也故言與

廿三

十八

聖相同滅諸罪太平興國中駕部員外郎李
鑄嘗知鳳翔府備覩靈應俄復奉詔監宮凡
十餘年志頗嚴潔

真君前後降語僅十餘篇其所錄者數首

一曰

建隆之初方稟希夷上帝命吾衆聖皆知乘
龍下降列宿相隨五嶽受命主張地祇潛扶
社稷密佐明時吾要李鑄知吾降期不得輕
泄免漏天機

又曰

與吾獨異佐國與吾以道理民與吾慈善理
家與吾不飲自醉醒時理民醉時理神此語
是延年益壽之法吾勸府主記取

又曰

爲官求理在貞明智慧俱通臨事清觀天行

道合陰德食君爵祿常若驚為吾洗心復換
骨背凡入聖奔長生天宮快樂勝凡世不夜
之鄉挂一名

又曰

府主累世為人生中國與吾清直莫行斜曲

廿三

十九

與吾積善累功與吾輔佐明主與吾洗雪黎
民與吾掛心刑獄

上帝若知名天官也剋取捨佳世轉流之財
但修取有形之像獲隨身之功得無量之福
與吾不得因循不柰時光迅速靈官賞汝功

勲天曹與汝添福若一一依吾聖言必得延年益壽

又曰

年登七十餘住世不久居饒君壽百歲問汝得幾秋地府直須怕冥司難請求有功無驚懼積罪必遭誅子孫難替代早覺莫癡愚

又曰

有緣無緣福業相牽有緣福至無緣業纏三業大罪信根不圓若遵吾語如倚太山

又曰

聽吾之語必延年亦將康健保安然至誠不
退修真理今生若在玉皇前

又曰

為汝虔心星辰下降來駕於玄風去乘於法
雨開盲愚之耳目迴積惡之人心盡歸投於

正路因汝醮告

上玄惡人盡來歸敬此汝之功也吾已與汝
聞於

上帝俾汝獲福也汝宜清者重清白者重白
明者重明勿初勤末怠中路變異迴清為濁

迴善爲惡設靈官奏聞

上帝若知有誤於吾也又七月十日夜

真君降言汝忠勤奉國惠愛臨民更要用心
勿違吾誠未遇吾之前所作諸惡吾與汝並
銷除也遇吾之後況無諸業左右已錄汝功

廿三

二十

也更須晨夕與吾積其善功勿得怠惰吾聖
言也又曰但行王事洗雪冤沈常差靈官護
助汝也或有諸事常行平正依吾聖言況是
太平君治化諸事前程汝但莫憂

又曰

托托莫憂煩軍府自然安每事依王道從他
天下傳

又曰

為主虔誠拜上玄宋朝社稷保長安不久太
平天下樂一家受福鎮如山

又曰

為主合虔誠將心助太平天宮繫其職每事
更宜精衆聖皆知汝舉措直須驚一朝功滿
後永住看三清

又曰

生前莫亂憂已後亦無愁主判陽間事凡人
得幾秋但依聖言著長生上天求

鑄每受一篇未嘗不晨夕諷誦焉又嘗謂鑄
曰汝年及八十別無修鍊之功未免掩形升
魂亦當有所主掌爾鑄再拜曰此生得遇

廿三

十一

上真下降屢受祕語他日儻獲主掌願與守
真同列

真君曰人間官職守真不及汝天上名位汝
不及守真也但心歸真正升仙階亦有時矣
淳化中西京留守中書令趙普嘗遣使備禮

致醮虔祈願聞休咎

真君降言曰趙普扶持社稷甚有功勳

上帝所知賜汝福壽然以大妨小幽府亦有
冤對當啓誦真經告祈天地首懺前非吾亦
與汝達于

上帝庶解茲咎汝官職壽數已有限矣其使
錄之而去普跪讀感涕因焚香謝過後遣人
詣宮設醮給事中參知政事賈黃中嘗遣人
投誠致禱以祈聖誨

真君降言曰聖主命臣臣之事君道佐當代

心依古人善惡無隱姦邪必聞君臣合道可
立功勲

又曰

愛民用心賞罰平等但依吾語合家保安
殿中丞張卓嘗乞聖言

真君曰大道養汝性陰陽生汝身爲吾勤行
道爲吾勤修真公廉常用意憂恤在乎民遇
時佐明主清濁上帝聞濁富終不乂清貧爲
天人莫教人道富從他人笑貧自有真家富
清高不愧負

又曰

形凡性不凡爲國顯清廉家積千餘口有罪

自家擔

又曰

但服陽和氣天竈再熏蒸地鑪別有用道德

廿三

二十二

日日新延年積福應真空若至清虛無有妙
理度脫有緣人

道士周務本嘗詣宮奏詞一通乞降真語

真君降言曰汝有詞言慕上天其如心意隔

關山仙宮不遠如指掌內外工夫全未圓陰

官察錄無譴過免墮豐都數百年依吾所語
合吾道要履三清應不難

張守真子元濟常齋戒詣宮

真君降言曰汝父守真遭逢於吾故令子孫
受福汝豈不聞信州龍虎山張道陵至今子

孫不絕亦逢於上聖得道之後應及後世汝
亦於吾有緣直須在家孝於父母食祿忠於
帝王立身揚名豈非好事又誨之曰

無事莫街行勤學必立名揚名在天下道廕

有長生

又曰

為過自家知善惡日相隨分明違天道問汝

阿誰癡

淳化中

真君降言示守真曰當今顯聖明修德動三

廿三

二十三

清上天歸正道四海息交兵八方欽睿聖五
穀盡收成勸君須修德上帝賜長生

又曰

關西賊寇緣應時數官家須指揮招捉使臣
莫殺平人官家修德之際正賊須剪滅又嘗

降言誠輔道士曰

千人心不同萬人心皆錯舉意不通與聖
難相約

真君又嘗降言誠官吏等曰

每存忠信齊其天文武班行自有賢爲主萬
年定基業常憂黎庶恐飢寒長行德行合其
道燒香虔祝告虛玄但願國安君長久齊心
輔佐太平年

又嘗降言誠朝臣等曰

擎天之柱著功勳包羅大海佐明君文王治

世及堯日輔弼乾坤在忠臣爲主直須行決
烈死生齊却戴皇恩常行吉善合其德慎終
如始莫憂身

進翊聖保德真君事迹表

臣欽若言臣聞高穹瞻命元聖膺期必有至

神聿彰幽贊謨訓標於保乂雅頌載於監觀
考古今之亘符見天人之交感臣欽若誠慶
誠抃頓首頓首伏以靈源錫羨炎德嗣興景
祚有開丕徵允赫惟玉晨之元輔奉金闕之
明威降精來不貳之民顯陰陽莫測之造佐

大邦之啓運告神宗之紹圖兆自幾先聳乎
聞聽繇是增隆靖館茂薦徽稱鉅典崇純
禧響答乃至播紳卿士橫目蒸黎稽首以瞻
眸容洗心以佇靈誥隨其性之遠近視其器
之淺深時亦戒以德音警其蒙惑諄諄之誨

廿三

二十四

咸洞其隱微蚩蚩之氓潛識其真正或魑魅
爲孽真鼎之所未刊或膏肓致妖秦醫之所
難究亦復俯聆虔懇遙授指蹤真教猥臨羣
邪必殄竊冥之象既炳於人寰颯歛之遊亟
還於霄極永載苾芬之紀潛施騰祐之祥凡

厥祕言悉存舊錄將伸倫次以示方來敢謂
微臣猥承明詔齊心仰誦盟手兢持莫究淵
渾粗伸紳繹竊念上真之茂躅實為昭代之
明徵豈夫庸瑣之材輒敢形容其事伏望皇
帝陛下垂旒注覽援翰摛文賜名以紀芳躅
作序以冠篇首式彰夤奉永耀洪休臣無任
瞻天望聖戰汗屏營之至其所錄成
真君事迹三卷謹隨表上進以聞臣誠惶誠
懼頓首頓首謹言

省表具之夫妙道爲大本於若冲至神無方
昭乎善應惟玉虛之元輔冠瓊簡之真階幽
贊裁成亶彰陰隲當藝祖之受命降福壤而
炳靈逮文考之紹休告

帝期而前兆式申美報肇建殊庭奉禳禴之

廿三

廿五

嚴科介蒼黔之丕祉若乃夷微委鑒肸蠁攸
憑示諄誨以惟勤昭明威而叵測恍兮之應
猶響泠然之馭亟旋自朕慕承寅加崇奉儼
睟儀於恭館薦嘉號於元都念祕誥之具存
表格思之攸盛期於綜緝以耀休徵卿任完

樞衡道熙邦采雅資博洽庶就編聯而能紬
緇帙以惟精封縹囊而來上懇求制序復冀
命名再循淺昧之辭曷叙直聰之烈勉從勤
請良積覲慙嘉尚之懷寤興無捨所請宜依
雲笈七籤卷之一百三

共



